



學生仰子愛掃泥下

笛卡兒講：「係思考，所以係存在。」梁啟超嘛講：「在不疑處有疑，即係進步。」得偲人去重新思考成過認為係天公地道个一兜風俗和事。識有學生質疑，學生仰子愛掃泥下？講係人係學生，係來學校讀書个，毋係來學校做工个，嘛毋係工讀生，嘛毋係來做愛校服務个，仰子係人愛掃泥下？起頭下聽著，若像係理由十足，毋過反轉頭來思考一下，學生仰子愛掃泥下呢？

杜威博士講：「生活即係教育，教育即係生活」、「自做內底學」。《朱子治家格言》頭句：「黎明即起，灑掃庭除，要內外整潔。」現時个真多大學，特別係東海大學佢个服務學習更加有名，學校內底个清潔事頭攞係學生包辦。分組去做，有人打早起來掃，有人當晝去拚掃，枷歸個東海大學掃到淨俐淨俐。

學生來學校，當然係來讀書个，毋過讀書以外猶有真多愛學个，真多更加係課本面上無教个。學生會講掃泥下係工友个事，毋係係人个。現時學校个服務員，係退一個即減一個，毋攞補啊，人力一直減少。而且服務員有服務員个頭路愛做，像係修剪樹樑，割草，顧傳達室，沃水、種花草和一兜臨時交辦个事。一間學校係大家个，隨人有隨人个頭路。團結力量大，大家出一份心力，真緊即會用枷學校掃得佢淨俐。在掃泥下个時，會用學著分工合作、做事个方法兼培養學生勤个慣勢。

生活个知能係靠普通時一點一滴訓練學習个，尤其係現代，學生愛學个物件更加多。毋會用做生活个戇呆，毋單愛掃泥下，嘛愛在掃个過程內底學著，愛仰子掃正會緊攞淨俐，定著愛在時間內完成這兜事个時間觀念，仰子和同學配合、分工、溝通。掃泥下即像食飯，愛逐日掃，像普通事講：「田愛日日到，地愛日日掃」，保持淨俐个好環境，得大家在學校內底生活更加快樂，心情更加好，達著境教个目的。

作者：李秉璋

☆詞彙學習☆

- | | |
|---|--|
| 【起頭下】ki ^ˊ teu ^ˋ ha：起初、一開始。 | 【隨人】sui ^ˋ ngin ^ˋ ：各人。 |
| 【反轉頭】fan ^ˊ zhen ^ˊ teu ^ˋ ：回過頭來。 | 【戇呆】ngong ^ˇ dai ^ˇ ：白痴。在此指生活白痴，連簡單的家事都不會。 |
| 【面上】mien ^ˊ shong：上面、上頭。 | 【毋單】m dan ^ˇ ：不單、不只。 |
| 【服務員】fu bbu bbien ^ˋ ：現在學校工友新的稱謂。 | 【得大家】ded ^ˊ tai ga ^ˇ ：給每個人。 |
| 【沃水】bbu ^ˊ fi ^ˊ ：澆水。 | |

☆文法學習☆

【枷學校掃得佢淨俐】ga^ˇ hoo hau soo^ˊ ded^ˊ gui^ˋ ciang li：把學校掃乾淨。「枷」意為「把」，表示一種處置；「得佢」意為「讓它、使它」，表示做出動作致使對象發生轉變。
 例：阿公个牙無好，枷豬肉煮得佢綿酪酪，佢正食會落。（爺爺牙齒不好，把豬肉煮得熟爛，他才吃得下。）